



**ATASSUT**

**UPA14/138-1**

**Knud Kristiansen**

**01.04.2014**

**Uunga siunnersuut: Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaata allangortinneqarnissaa pillugu Inatsisartut inatsisaat.**

(Avatangiisinut Pinngortitamullu Naalakkersuisoq)

ATASSUT-miit inatsisip allannguutissaatut siunnersuut matumuuna oqaaseqarfigissavarput.

Siullermik ATASSUT-miit Naalakkersuisut qutsavigissavagut, inatsisissap allannguutissaa, piffissami sivisujaami piareersarluarneqareerluni, Kommuunillu peqatigilluinnarlugit una allannguutissaq maannakkut saqqummiuummassuk.

Nunatsinni upalungaarsimaneq, sillimaniarnerlu eqqarsaatigalugit piariaqartitsineq, aammalu pitsaaliuinerlut tunngatillugu pisariaqartitsineq annikilliarunngilaq. Nunatsinni illoqarfinni nunaqarfinnilu ineriartorneq sukkaqisumik ingerlatillugu, illut portussusaat annertusiartuinnartoq, illoqarfiit alliarturneri, nunaqarfinnilu suliffissuit eqqarsaatigalugit upalungaarsimaneq, sillimaniarnerlu tamatigut pingaartittariaqarpoq.

Ukiut kingulliit eqqarsaatigalugit, nunatsinni sumiiffippassuarni, ineriartornerup nassataanik, aamma sillimaniarnikkut piareeqqanerup piumaffigineqarnera suli annertusiartorpoq. Pingaartumik aasakkut takornarissat umiarsuarsui tikittarput inuppassuarnik ilaasullit, nunatta imartaani umiarsuit ingerlaavarput, nunanit allaneersut, takornarissat, uuliasiornikkut misissuisut. Taamaattumillu ATASSUT-miit pingaartipparput, ineriartornerup piumasai aamma inatsisiliornikkut naapertuuttumik ilusilersorneqassasut, akisussaaffiillu aamma ersarissumi, naapertuuttumillu atuuttariaqartut.

Inatsisissap allannguutissaanut attuumassuteqartut pillugit, ATASSUT-miit nuannaarutigisatsinnik, kommuunit, uanilu inatsimmik naammassinninniartussat pikkorissaanikkut, tassa siornaak



allannguutissamut atatillugu kommuunit, upalungaarsimanermilu pisortat sulisullu peqatigalugit pikkorissarneqarsimapput, taamaasiornikkut ATASSUT-miit isumaqarpugut, inatsisip allannguutissaanut sumiiffinni upalungaarsimanikkut, sillimaniarnikkut, annaassiniarnikkullu eqqarsaatigalugit kommuunit tigusinissaminut piareersimasut.

Inatsisissap allannguutissaa, malunniuteqarnerusussarlu tassaavoq, allannguutissap aappaagu januaarip aallaqqaataani atuutilernerani, kommuunit sumiiffinni upalungaarsimanikkut, sillimaniarnikkullu pilersaarusionerit tamakkiisumik tigussammatigit. Tamannalu sumiiffinnut naleqqussaaneruvoq, siornatigit qitiusumiit ilusilersorneqartaraluartut.

ATASSUT-miit neriulluarpugut, uunga inatsisissap naleqqusarneqarneranut, tassami ilisimavarput, sumiiffippassuarni, pingaartumik nunaqarfinni, qatserisartoqarneq tamaat eqqarsaatigalugu ineriartortitsinissamik pisariaqartitsineq annertummat. Naak una inatsisissap allannguuteqarnissaa immikkut kommuuninut tapiissutitigit aningaasanik amerlanernik malitseqanngikkaluartoq, ukiut siuliini naleqqussaannermut aningaasaliissutit aaqqissuunneqarsimapput, ukioq mannamut aamma eqqarsaatigalugu, taamaattumillu ATASSUT-miit isumaqarpugut tamanna pitsaasuusoq.

Inatsisissap atuutilernerani piginnaatitaaffik, Naalakkersuisuniit Kommunalbestyrelsenut pissaaq, tassa kommuuninut.

Kommuuninilu pisariaqartitat, upalungaarsimanissamut, qanorlu pisariaqartitat annertutiginerannik aallaaveqartumik pilersaarusionerit, iliuusissallu suliarineqartalissapput. Tamannalu ATASSUT-miit pitsaalluinnartutut isigaarput, ilaatigit aamma eqqarsaatigalugu nunaqarfinni illoqarfinnilu qatserisartoqarnikkut, sillimaniarnermilu atortut eqqarsaatigalugit tamanna piviusorsiorlumik naammassiniarneqarnerisinnalissammat, sumiiffinni upalungaarsimanermut pisortat peqatigalugit.

ATASSUT-miillu pingaaruteqartillugu oqaatigissavarput, illoqarfippassuarni upalungaarsimanikkut sillimaniarnerlu eqqarsaatigalugit, qatserisartut suliassarpassuarnut aamma atorineqartarmata, soorlu annaassiniarnernut, qaqqani, imaatigit, sikukkut, nunakkullu, aammalu minnerunngitsumik sumiiffinni, angallavinnilu ilisimasaqarluarneri atorluarneqartarmata pikkorissaanertigit ineriartortitsineq kommuunini tamani aallunneqartuarnissaa kaammattuutigerusunnarmat.



## ATASSUT INATSISARTUNI

---

Soorunami ATASSUT-miit eqqumaffigaarput, inatsisip allannguuteqarneratigut, akisussaaffiilu kommuuninut tunniunneqarnerani, pisariaqartitsinikkut nalilersuinerit, sumiiffiit eqqarsaatigalugit assigiinngissinnaammata, taamaattorli pingaartillugu, ATASSUT-mit kaammattuutigissavarput, annikillisaanermik tamanna tunngaveqarani pitsanngorsaanikkullu aallariartitsisoqarumaartoq.

Taamatut oqaaseqarluta, inatsisissaq akueralugu, innersuussutigissavarput aappassaaneerneqartinnagu ataatsimiititaliami susassaqartumi suliarineqassasoq.